

vostre vaisselle d'argent avec vne petite tasse, ne deuoit estre appliquée qu'aux Saints Autels, et l'on ne deuoit pas la destiner á d'autres vsages sans la profaner; Et á proportion que le nombre des comunians augmentera dans cette Mission, le nombre de ceux qui prieront Dieu pour Vostre Grandeur d'auoir logé le Sauueur du Monde dans vn si beau Ciboire, augmentera aussy; Et puisqu'Elle a bien voulu me promettre vn Soleil pour exposer le Saint Sacrement a la Veneration de ces pauures sauvages, Nous Vous serons redeuables, Monseig^r. de tous les actes d'adoration que Jesus Christ receura au bout du Monde parmj les Illinois. Quelque attache que i'aye pour ma Mission, J'aduoüe que ie ferois encore volontiers le Voyage des Outa8acs a quebec pour assister a la Messe de la Cinquantiesme Année de Vostre Sacre, Monseigneur, comme i'ay eü le bonheur d'assister á celle de vostre prestrise; Et ie ne puis rien dire a tous nos Peres des Outa8acs de plus consolant, dans les persecutions que Nous souffrons, que de les asseurer que Vostre Grandeur se porte bien, qu'Elle nous continüe toujours ses bontéz, que Nous viuons avec tous les Messieurs de Vostre Seminaire dans vne parfaite vnion, et que vous Nous regardéz toujours, Monseigneur, comme vos Enfans. Je suis dans vn profond respect.

de Vostre grandeur,—

Monseigneur,

Le tres humble, et tres obeissant
seruiteur et fils, en N. S.

JAC. GRAUIER, S. J.

A Ville-Marie
le 17^e. Septembre 1697.